

第玖冊

列女志一

列女志二

古今續編

商水縣志卷二十一

列女志一

賢母

清

胡其秀繼室劉氏性純謹克執婦道善事翁姑三十餘載無間言教前子希桐有方篤愛尤至桐亦善承慈訓奮志讀書遂入庠氏生三子與希桐友愛甚篤氏教之也

舊志

李天章妻雷氏淮甯舉人雷兼山女性慈惠夙嫻姆儀通詩書明大義于歸時翁已早世事姑曲意承順家計日艱氏屏鉛華操井臼不辭勞瘁天章多交遊好施濟氏苦心經理仰事俯育不使天章有內顧憂子三長毓英次擢英三延英自孩提卽口授諸書稍長延師督課飲饌必自治時典衣爲脩膳資未幾天章

商水縣志

卷二十一

列女志

一

卒於舞陽訃至命毓英擢英前往扶襯歸氏痛極欲殉諸孤號泣跪懇氏亦仰念慈親俯憐幼子竭力營葬家益窘不得已乃率子女往就父任於鄆城學署求教養焉氏念家况凋零時時以立志勤學勉諸子越三年毓英擢英同入邑庠旋食餼同治甲子毓英舉於鄉癸酉擢英膺選拔氏心竊喜猶促擢英赴會考兼應鄉試八月二十日以疾卒是科擢英中式丁丑成進士而氏皆不及見矣

貢生趙做繼室李氏庠生騰蛟女嫺姆訓相夫子能敬撫前房子曲盡母道生二子國藺國廉幼使讀書不事姑息國藺國廉蜚聲庠序均貢成均初氏于歸時家庭多故氏茹苦飲泣不知凡幾至二子成名始可稍安乃子孫兒媳輩各有喪亡遺諸孫男女無依喪葬嫁娶迄無甯日有庶母年老每歸甯必多餽遺賢

孝其天性也壽六十餘卒

王成偉妻張氏張興行女監生永祥胞妹性嚴正幼嫻姆教歸成偉家貧甚氏勤女紅佐夫讀事姑竭力承歡咸豐乙卯姑棄養成偉以哀毀卒氏年三十二一子炳揚方六歲往依外家炳揚始入學尋以捻匪亂復歸城竭力教子讀書或少懈氏責曰王氏一綫延惟汝汝不成無望已言訖淚涔涔下炳揚遂憤於學未冠入庠旋食餼鄉試屢薦不第以恩貢成均家居授徒氏屢勗曰安貧守已勿預公事盡心課徒汝職也故炳揚持身謙退廉節自飭足跡不輕至公庭教授數十年弟子貧者束脩概辭不受遵母教也光緒初歲饑族中不能舉火者數家氏量資助之謂子婦曰吾家雖窘日猶兩餐彼不獲一飽可憫也平日好善樂施多類此卒七十七彌留之際猶喃喃以教孫繼書香爲

商水縣志

卷二十一

列女志

二

念孫二德培庠生德均業儒

武生李護公繼室王氏監生王朝棟女性貞靜五歲失恃依繼母成人年二十五歸護公時姑已老服事維謹咸豐末避亂遇雨姑夜饑氏乳之不食乞米一掬爲粥暗以乳汁傾入進姑病晝夜侍湯藥積勞成疾猶力支無倦容夫患啖喘氏焚香告天求身代居夫姑喪哀毀逾禮生三男一女前室子二愛如所生長子別居蕩業以已養老地二十畝盡與償債夫姊劉胞姊張皆年老尙獨無歸氏歲時周濟復迎養之數十年沒則殮而葬之母家貧父母及諸父母兄弟經氏營葬者凡六喪張氏姊苦節屬子敦仁爲請旌立碑表墓黃氏女彭氏孫女均以貧寡招至家養之且爲其子各定婚焉光緒三年大饑氏散豆穀十餘石濟族鄰借貸者悉焚其券每歲除夕族人無告者徧給薪米以

爲常或無力婚嫁喪葬恒助之金佃戶貧亡者嘗給棺貲或令葬己地平生自奉節儉獨於祭先款師從豐教女及子婦敬祖孝親勤婦職和娣姒禁嬉戲謾罵每日非有疾黎明卽起檢點中饋等事至老猶然子敦仁宣統己酉拔貢考州判以子貴例封安人壽七十八無疾而逝敦仁記平日訓言數十條藏於家許恒昌妻王氏性勤儉助夫理家拓地至二十餘畝夫故教子景槐景洵嚴而有法景槐年五旬偶有過猶呵責不稍貸鄉鄰欽之公送匾額壽八十五

邵安妻邱氏性慈祥善處鄰里惜老憐貧一家化之五世同堂子二孫二曾孫二玄孫二氏九十七歲藹藹一堂里黨爭羨

何某妻某氏漣雲母性淡泊好施與壽百餘歲鄉鄰咸推爲好善之報

倪榮先妻李氏于歸數年夫染瘋疾故氏年二十八歲子延壽甫九歲氏性貞靜慈愛待人教子有方又惜老憐貧鄉里困窮者多沾其惠卒年八十有五已旌

庠生周制禮妻馬氏性賢淑嘗典釵助讀有鷄鳴戒旦風制禮卒遊泮水子心廣教之讀早歲能文尋逝氏年逾四旬祇一女勸夫置妾制禮納張氏張固宦家女幼涉書史頗明大義曾手書教子姑性最嚴張曲意承歡事馬氏敬順無違以小星自居馬亦相與和睦娣姒均稱其賢子蓮堂庠生

賢婦

漢

袁隗妻馬氏融之女字倫少有才辨融家世豐豪裝遺甚盛及初成禮隗問之曰婦奉箕帚而已何乃過珍麗乎對曰慈親垂愛

不敢逆命君若欲慕鮑宣梁鴻之高妾亦從少君孟光之事矣
隗又曰弟先兄舉世以爲笑今處姊未適先行可乎對曰妾姊
高行殊邈未遭良匹不似鄙薄苟然而已又問曰南郡公學窮
道奧文爲辭宗而所在之職輒以財貨爲損何耶對曰孔子大
聖不免武叔之毀子路至賢猶有伯寮之愬家君獲此固其宜
耳隗默然不能屈帳外聽者爲慚隗旣寵貴當時倫亦有名於
世年六十餘卒

清

王恭已妻郭氏內府中書天錫公女也年十八于歸恭已恭已故
明官裔經兵燹之後家業蕩然氏雖出名門而謙謹自持雅執
婦道絕無富貴驕人之態親操井臼善事舅姑荆布蔬食晏如
也性嚴整教子義方無少姑息雖扼於時命功名未就而忠厚

商水縣志

卷二十一

列女志

四

醇謹亦自無忝家聲長孫伯學名振膠庠食餼天家蔚爲一邑
之宗非氏之力不及此以故賢孝之聲喧於閭里壺德堪式伏
候旌表

貢生李震普妻陳氏少貞靜閑雅不減林下風致年十九于歸震
普克篤婦道治家嚴明內政肅然有條事舅姑以孝聞諸子則
以義方訓之雖夙號素封而被服布素晝夜績紡不輟其勤於
女紅如此繼姑魯氏病篤氏與妯娌氏王朝夕侍奉體恤周至歿
則盡哀盡禮允足以當大事至其處妯娌數十年無閒言尤人
所難能者以夫封宜人知縣李新猷表其門曰賢孝可風
庠生李爾銓妻喬氏性嚴整明大義壯年舉數子不育勸銓納妾
爲後嗣計銓曰此吾命也何以妾爲天苟不絕吾嗣爾豈不生
育乎不聽乾隆七年氏年四十七自度不能育子勸之益堅且

出其妝奩銀伍兩助成之嫡庶相處和好無間妾生子女喬視若己出李祀不斬喬之力也

庠生支方卜妻吳氏庠生吳玠女也年十八于歸時舅姑俱歿惟祖翁姑在堂氏曲意奉侍無間温清人以是賢之夫有從弟可大五月失恃氏承祖翁姑命撫養之可大長入邑庠氏教之也監生陳方至妻劉氏幼嫻內則持身端重寡言笑甫十齡事母克盡職十五賦桃夭雅執婦道外言不入閨門之內肅睦凜然人以爲有柳氏風事舅姑寢膳必親視不委僕婢姑卧病甚篤氏衣不解帶藥必親嘗籲天求代三十晝夜未嘗少懈未幾姑歿氏痛幾死朝夕供奉如生時庶姑蔣氏患癱氏事之如姑十五年間不暫離蔣感泣語人曰願新婦子若孫亦如新婦孝敬康熙四十七年春氏病且劇猶急呼曰殯我姑願從事於地下也

商水縣志

卷二十一

列女志

五

遂氣絕越明晨家人及比鄰聞空中鐘鼓有人語曰劉氏事姑孝上帝嘉之延壽十七載須臾氏甦所言與家人同後果十七年而卒鄉人咸驚異稱其純孝知縣吳曜題其柩曰婦德常昭羣說閩範未遠母儀何在應嘆孝婦云亡

監生陳增妻高氏幼嫻女則長適增善事舅姑曲盡婦道姑有命或責罰未嘗不欣然承受姑病幾危暗嘗其糞以占病機其味轉甜氏乃號泣籲天願以身代姑病尋愈未幾舅姑相繼卽世兩當大事佐其夫盡哀盡禮不至遺恨終天者氏之力也有僕女翟氏父母俱亡氏養如己女爲擇婿嫁之婦德婉婉殊有孟陶之風舉四丈夫子長大琰成太學四大琳幼遊泮二三大玠大受皆業儒論者謂人道無虧生順歿寧云

張曰梅妻李氏事繼姑劉氏以孝謹稱劉卧病甚劇氏焚香祝天

願以身代復割股以進劉尋病愈鄉里稱其純孝

監生李震昇妻王氏適震昇年十六卽克主中饋井然有條姑鄧氏患癱不能起氏竭力奉侍無閒晨昏繼姑魯氏病氏親嘗湯藥晝夜不懈與事鄧等姑歿撫養夫弟震旺震普成立賢孝之聲洋溢里巷

監生李興妻陳氏十七于歸素嫻內則克盡婦道事翁姑以孝聞姑歿事庶姑夏氏如嫡姑謙德和氣坤儀堪式內外稱之無閒言

庠生趙之魁妻石氏魁幼病癘氏事翁姑惟謹翁患癱氏親滌溺器湯藥飲饌必親奉翁性暴少遲卽杖擊之氏跪受無怨言閱八年以勞憊病血猶不自恤每夜焚香祝天願減壽代親未幾姑亦癱復籲天自誓願衣單食素三年不理髮不爐火祈佑姑

商水縣志

卷二十一

列女志

六

病及翁姑歿營葬事竭盡心力無稍遺憾又嘗施粥三年以濟孤貧親族中有無力婚葬者輒捐貲助之純孝淑德允堪儀型閨閻

馮君重妻賈氏十九歸馮溫柔恂謹家人皆悅之姑獨不喜凡事責以難者氏應命無違一日姑小恙氏殷勤問飲食不答又問姑怒曰欲食爾肉氏退卽割右股爲羹以進姑食之越二日祖翁見氏隻手而舂怪問之佯曰瘡也祖翁疑之使其祖姑解視乃刀痕也問故答曰姑病以食吾姑耳祖翁大怒切責其翁姑聞而愈銜之陵爍倍甚氏抑鬱踰年自縊死至今言及猶有爲之流涕者

以上舊志

庠生王昌業妻李氏增生李率性女好學能文翁病佐夫侍藥晝夜不離側昌業孝友多氏內助之力

節舊志王昌業傳

貢生李桂芳妻陳氏性慈善好施濟雍正年歲薦饑鄉鄰負桂芳債千餘金氏勸夫悉焚其券又重讀書教子尊師重道不稍寬假子郡深得母教後貢成均敦好禮義士林稱之乾隆七年淮甯知縣許佩璜以柳丸歐荻額其門

州同李樹勲妻王氏縣丞王汝佳女年十九于歸奉事孀姑敬慎無違乾隆元年河決水至縣境東西馬坡氏勸夫賑濟鄉鄰增築隄岸水退施麥種百石姒氏朱早寡無所出氏止一子來慶朱鍾愛之欲撫爲嗣氏不忍拂其意遂與之子又早世邑侯張崇樸聞其賢作有賢孝傳

王錫魁妻牛氏錫魁雙瞽牛事之無違志有乞兒甫三歲牛憐而收之名寶珠愛如親生氏生子寶玉及析居產業令與寶珠均分又姨甥謝光昌太康人生二歲父母俱逝牛召至家撫養成

商水縣志

卷二十一

列女志

七

人給產完婚至今寶珠子孫二十餘口光昌妻子共六口皆牛賜也

趙相元妻萬氏性嚴正寡言笑年十九歸趙克執婦道家貧日用不給勤績紡佐饗殮奉事翁姑無缺禮翁姑歿與其夫竭力營葬俾無遺憾及夫故亦如之子二應山如山應山納聘於王氏入門事姑尤孝勤儉過之姑病一切附身附棺具氏皆預儲及沒夫婦無臨時憂一子明坤夫甚愛之氏不事姑息勸延名師朝夕教誨年未弱冠蜚聲鬢序庶子明方亦均入庠皆氏力也晚年寡居教訓諸孫男女仍事孝順惟嘗以姑未及享含飴之樂爲憾萬年五十三卒王年七十四

庠生胡萬書妻陳氏茶陵知州萬清長女讀書通大義事翁姑曲盡孝養萬書入庠得內助之力極多教五子嚴而有法時授之

讀怠則鞭扑之未嘗稍事姑息子存誠存讓寶善均列武庠存一存謙援例入國學孫喜迎爲名諸生氏愛讀儒書家雖素封而謙謹自持井曰親操爲諸婦先絕無富貴驕人態壽八十四無疾而終

拔貢李光遠繼室凌氏母家西華名族氏通詩書嫻禮義二十歲于歸執婦道甚謹閨門內無戲言年二十八夫故毀妝改容貞潔自守不輕言笑撫前房子有恩二女幼卽與講解內則及古今賢孝節烈事家規謹嚴不令婦女遊廟觀劇男女出入限以中門子孫衣冠不整言動偶疎立即訓責常側侍斂容不敢作俚俗態遇弔祭慶祝或以小兒代之必問若父叔何爲責以輕慢平生持身勤儉荆釵布裙取其潔而已家雖富厚不忘蠶織曰此婦人職也瓜果不食菜根不輕拋棄曰天地生長人力灌

商水縣志

卷二十一

列女志

八

溉不可暴殄也素康健夏不扇冬不爐黎明卽起盥梳後監督家政無事終日端坐壽九十二無疾而終

李敦臨妻閻氏讀書明大義敦臨有痰疾家政賴氏主之生子女各二夫故氏年二十九清節自勵咸豐八年扶姑攜子逃難夜至沙河千凍餒交迫乞食以供姑姑疾焚香拜禱願以身代及卒葬如禮教子有方長子正立甫成室夫婦俱亡次子正豫弱冠入庠氏好施濟有姪女幼喪母于氏外孫女父母早逝氏招至家撫養成人擇配名門厚嫁之光緒十年捐金百餘修臨川橋二十三年歲歉族黨貧乏者按戶給糧又嘗印送功過格竈君靈籤敬信錄等書嘗教子曰讀書須學好人除此皆身外事耳光緒丙午旌表如例壽八十歲卒

監生胡克文妻李氏國學生李化九女年二十九夫故家極貧苦

志守節事翁姑克盡其誠夫兄武生秀迎夫婦早亡遺二子裕辰裕清均數歲氏撫養如己生備嘗艱辛家道漸豐撫裕清爲嗣援例入國學壽七十三光緒戊申禮部奏准入節孝祠
胡天命妻周氏夫故家貧苦守子四仲季早亡伯子萬然長歸商叔子萬熙天性聰敏令就傳讀書嘗典簪質衣以供脩膳萬熙弱冠餼於庠爲名諸生氏性勤儉晚年失明猶操持家務不怠壽八十二
王福田妻陳氏歲貢治策胞妹幼嫻姆教年十九歸福田事翁姑養葬盡禮二十九歲夫故僅二女以夫兄蘭田子潛修兼承夫嗣數年潛修夫婦繼逝撫孫峻德延師課讀援例入監樂施予凡睦族卹貧修補橋路諸善事無不竭力助之性使然也卒年九十有一

庠生李昶之妻劉氏恩賜舉人劉了凡女十九于歸數載夫故子女俱無號泣欲殉族人憐之以長門子恂爲嗣氏節操自勵且樂善好施村東南有夜月橋氏出資獨修鄰里高其節義匾其門曰巾幗達人孫媳王氏年十七于歸甫週歲而夫故遺子蔭棠僅數月撫養成立家業振興皆氏義方之訓使然也

舉人李毓英妻陳氏陳幹卿女于歸時翁已見背事姑甚謹歲時助夫致祭必豐潔誠敬而自奉極儉處娣姒若姊妹愛夫姪輩如子待人無疾言遽色鄰里有以急告者竭力周濟之夫捐館次子生甫三日氏年未三十越數年長子又亡撫幼子國璋恩勤備至稍長從師不事姑息國璋弱冠入庠六十餘卒由禮部呈請旌表准建坊入祠

李維賀妻夏氏知縣愍公之母性端嚴教子成名愍公筮仕直隸

氏嘗勉以勤政愛民道光十五年黃水爲災氏勸夫散粟救貧鄰里戚族借貸無弗與力不能償者不與較操家勤勞晚年猶早起督課家衆五子卓然成立諸孫滿前

趙福元妻劉氏儒家女性仁孝遇事識大體年十九歸福元僅有薄田數畝氏恪勤婦職必以甘旨供親家漸小康姑早逝遺二女尙幼惟氏是依氏教勤女紅守閨範毫無猜嫌翁嗜酒盤殮必須兼味每食爲常飲且醉輒怒不息氏侍奉惟謹十餘年無倦色夫弟少廢學飲博蕩產福元屢戒不聽氏常暗資給之不使妻子凍餒氏好濟貧乞者至無男婦老幼必以米粥與之嘗謂諸婦曰窮人疾苦吾素深知汝當如我存心諸婦皆唯命卒年七十有五子二長岐山勤謹質樸福元以家事委之次崇光少讀書氏督課甚嚴早年食餼尋貢成均

監生許國秀妻李氏無子勸夫納筵室王氏毫無妒忌王氏生子蕙芳氏教之有法早年入庠孫炳煥以捐資入學堂獎知縣

周端妻李氏于歸後夫家中落饔飧不給氏事繼姑孝敬弗衰常於雪夜破屋中挑燈刺繡資工價以養歷三十年如一日冬寒猶衣單薄母族或與以綿衣歸卽奉姑姑卻之跪進受而後已生二子長於德弱冠列拔萃科署封邱教諭次之德邑庠生人謂孝德之報

趙光義妻朱氏性儉樸于歸未幾值捻匪亂室盡焚貧不能自理母家代爲修葺夫好博氏極力規勸夫怒捶之氣絕復甦猶苦勸不已勤於織紡愛惜物力夫早亡教子君普君賜力田氏躬親率作家業漸興孫國鈞弱冠入庠氏卒年七十三

朱百林妻李氏事翁姑孝夫故子女俱幼教養有方光緒三年歲

凶饑民嗷嗷待哺氏出粟五十餘石賑濟貧鄰全活甚衆鄰里德之子文光亦克家

趙利仁妻劉氏姑悍舅懦家常不足衣食自氏來歸數口皆得飽煖一叔未娶氏爲衣食必擇其美者奉之曰叔無妻非此心安也小姑未嫁代爲縫紉曰姑心所愛也內外操作不憚勞苦家業漸裕子祥蘭極忠厚

王性南妻許氏家奇窮賴氏拮据餬口性南病將革謂氏曰吾病不起勿忘夫婦義能育我子俾承先人祀吾瞑目地下矣及卒氏哭死復甦者再忍痛苦守撫子女成立卒年八十有四柴煥文妻顧氏事翁姑和顏悅色子萬聚教之有方俾親正人子能克家諸孫繼美至待宗族鄰里一本忠厚族鄰德之公贈匾額以表其門

商水縣志

卷二十一

列女志

十一

申秉誠妻張氏張躬女性賢良事翁姑孝敬無違夫兄秉乾夫婦早世遺孤欽修數歲撫若已子教養成人父母繼逝弟亦亡惟庶母在瞽且貧氏迎養於家二十年及沒歸葬從豐凡遇先人生忌日必竭誠致祭終身未嘗稍忽鄉黨稱之

耿寅妻李氏性忠實家貧助夫佃田勤苦自勵佐主人婦中饋紡績晝夜勤勞歷數十年主婦依重之父老無子生養死葬惟氏工資是賴夫歿撫子女成人

李瑤章妻時氏儒家女中年天故遺孤中連教以義方慮染市井習移居鄉村以耕讀爲務克勤克儉家業漸興氏好佛喜與人言因果婦女多因之向善有鍼工彭雪妻早寡家貧三子餓死者二氏代養其幼子常以名節勸勉彭卒保其節

王從典妻郭氏生而貞靜六歲喪母父紹陽內教嚴肅稍長卽循

守禮法年二十于歸甫三載從典歿無子承翁姑命以夫從兄子逢年爲嗣翁患癱數年事奉無稍懈翁姑歿夫弟乃昌方幼逢年僅三齡氏撫弱叔幼子兼操家計心力俱悴乃昌成室後氏竭力供之讀書逢年改就商業中遭兵燹倉皇逃避備歷艱辛平生恪守閫範賽神觀劇之場未嘗一履其地壽七十有八已旌

李渭公繼室秦氏性賢孝事庶姑罔懈父老貧無歸迎養於家卒備衣棺葬之生子敦文待前子敦詩與敦文等教子不事姑息夫歿敦詩夫婦亦相繼逝未幾孫正朝夫婦亦歿遺曾孫學斌學純撫之成立壽八十餘端坐而逝

李溫公妻陳氏勤儉溫良克執婦道中年而寡教養三子一女成立翁姑歿朝夕焚香設奠歲時薦新終無懈志處娣姒能忍讓

商水縣志

卷二十一

列女志

十一

井曰身親一切米薪等物不敢暴殄平生未嘗遊廟觀劇不道他人短長壽七十餘

常錦妻王氏性溫和善持家教子敬止入武庠敬宗入國學夫婦妹八人氏處之有道和好無間終身如一日壽近期頤精神不衰鄉里慕之以寶婺生輝萱闈春暖表其門

蕭啟訓妻孫氏童養夫家孝事翁姑及成禮姑逝遺二叔均幼小姑尙在襁褓氏撫育周至家又極貧以紡織度日爲二叔成室小姑擇配嫁之鄉黨稱賢

屠振綱妻李氏光緒初大饑氏以雜糧五十餘石賑濟貧民慮小惠難徧令雇工葛等磨之葛畏勞欲去氏勸曰吾之糧汝之力願同此善葛大悟力肩其勞坐施門前全活無算子以方媳張氏均好善將順其美宣統二年河決白帝又施飯難民鄉鄰嘖

嘖稱德惠焉

竇林妻馬氏性賢良孝事翁姑處娣姒以和勤儉持家家道賴以
小康無子壽七十餘

支友賢妻朱氏朱臻女友賢少有愍疾氏事之無違禮夫婦壽踰
七旬無子以夫姪天申爲嗣

孫登榮繼室趙氏歲貢趙崇光胞妹性溫和幽靜寡言事舅姑曲
盡婦道務得歡心處娣姒和而能忍于歸時前室子寶祥甫週
歲氏視如己出撫養成立從師讀書督課甚嚴寶祥亦恪遵氏
教彬彬雅飭

閻永祥妻康氏康以忠女性賢淑年十八歸永祥有田數畝僅足
餬口翁姑素善病氏奉養惟謹不憚煩病轉劇日夜侍側衣不
解帶者年餘夫有從伯父無子且多病氏事之如翁父以忠家

商水縣志

卷二十一

列女志

十二

中落亦無子迎養於家子芝芳庠生蘭芳萼芳

柴成瑾繼室紀氏夫故前房子世振世鐸尙幼氏撫之有恩善持
家置田五百餘畝嘗以勤儉勵子孫至遇戚族困窮者務周濟
之子孫至今仍遵氏教焉

李某妻程氏甲科母性賢孝事舅姑先意承志周旋庭幃一生無
忤顏姑歿哀慟過禮因眇一目親鄰交口稱之

薛如銀妻李氏性賢孝奉翁姑曲盡其道事夫敬順無違夫少患
痰證人事不甚了了言無倫次氏未嘗與辨付之一笑而已娣
姒戚黨無不喜其和而頌其德

王更新妻邵氏天性賢淑于歸數月而姑歿遺夫弟二人皆幼氏
撫之情義兼盡至於成立十餘年不聞詬誶聲事衰翁克盡孝
養人以爲賢

許望德妻雷氏性賢淑識大義夫故撫夫姪懷珍爲嗣教養恩勤
孫憲章入國學龍章人武庠氏壽八十四

顧宗賢妻楊氏于歸時夫家清貧氏椎髻布裙身操井臼孝事翁
姑翁卒事姑鄭益謹家業日興咸同問捻匪擾境大兵雲集氏
勸夫及子以錢千緡銀五百兩助餉他如書院粥廠橋梁廟宇
各義事慨捐數千金贊助之壽八十四以孫民岩貴誥封宜人
馬元妻徐氏年及笄元有惡疾父母頗悔欲爲改婚商於元父母
許之氏聞謂父母曰疾病常也生死命也旣許爲婚豈容改議
甯死不從父母意阻年二十八于歸恪盡婦道奉事湯藥衣不
解帶者二載旋因勞致疾卒

庠生王中和妻張氏性賢淑年十八歸中和事翁姑恪執婦道家
貧氏勤女紅以供甘旨中和資其內助勤苦力學嗣因家計益

商水縣志

卷二十一

列女志

十四

窘棄儒爲吏同治四年七月有黑龍江兵過扶蘇寺守寨者誤
爲匪炮斃數人兵誣以叛報縣令某懼卽飭刑房票傳鄉保籍
該紳民將會剿中和適爲該房科長聞命有憂色氏問故以告
氏曰曷代求免求不得死者於我無憾矣中和詭言有要聞入
見縣主請曰小人天良難昧稔知扶蘇寺寨皆良民以小心防
匪誤傷兵弁情實可原卽科以誤殺罪亦惟正凶作抵株連無
辜恐或激變故敢冒死爲衆請命言訖叩頭哀懇縣主是其言
但坐爲首者數人餘俱保全又光緒初中和有瓜葛親趙張氏
至家以夫醉歸暴亡疑爲同飲者所毒欲鳴官氏心知其誣解
曰事勿躁宜慎之適中和歸自外氏語之故中和詰趙曰汝夫
醉歸卽死乎抑遲時乃死乎曰遲數時飲水平曰飲中和曰汝
鳴官必驗無毒痕必反坐詳思之恐誣也事遂寢中和性過剛

一生喜報不平事氏屢勸之卒免訟累至捐貲施茶藥助修廟宇橋路氏多贊成其事及中和晚年入庠蒙恩賜耆老銀牌仰荷恩榮而氏已不及見矣子育德廩生邑中善舉皆樂從事氏之教也

王盡美妻段氏性賢淑善事翁姑處娣姒以和待姪輩如所生勤儉持家厚待族鄰今氏沒已四十餘年鄰里猶追稱其賢娣姒子姪言之有淚下者

李秉仁妻雷氏持家勤儉事翁姑克盡誠敬翁姑愛之使主家政咸有條理家業振興氏之力也

李鈞妻劉氏溫柔恂謹賢孝性成鈞幼患瘋癘不省人事氏以義命自安事之惟謹人稱其賢

王自貞繼室趙氏性貞靜事舅姑承顏順志前室遺一女氏撫之

商水縣志

卷二十一

列女志

十五

如所生教子嚴而有法有過不稍寬假治家勤儉尤能和娣姒睦族鄰鄉里交稱其賢卒年八十有一

李寶璉妻李氏夫患癱且貧不能爲生氏絕無怨色事夫無違資浣濯縫紉以養舅姑姑病百藥不愈暗向竈前祝告割股煎羹以進姑漸愈而日計益窘不得已將所生次子方六歲鬻於冷姓得錢以養姑姑病愈問次孫何往氏詭曰去姨母家姑日屢問氏始告之姑泣氏亦泣設法贖回以慰姑心

傅學煥妻李氏監生李渭公女生二子俱殤僅一女氏勸夫納妾生子女各一氏撫若已出妾亡氏操勞益甚姑與夫均稱其德鄰里無閒言

李嵩峯妻李氏庠生李海觀第三女生有至性十八歲于歸克執婦道翁泰來病中夜焚香竈前割股和藥奉翁病遂愈

監生李興妻陳氏年十七于歸克盡婦道事翁姑孝姑歿事庶姑如姑謙德和氣內外稱之

趙會溥妻王氏十七歲適趙逾年翁患病百藥無效氏默禱於神割左肱肉以療之病果愈人以爲孝感氏壽八十餘

武生李殿甲妻董氏事姑甚孝端莊靜一未嘗失色失言獨不見愛於夫姑病垂危氏暗割肱肉以療舉家莫知偶於夏日姑見割痕問故始知姑媳感痛愛媳愈篤力禁殿甲無禮於婦

李秀章妻劉氏十六歲于歸姑患癰證供養甚謹寢處與共二十餘年辛苦異常未嘗怨怠姑甚德之中年秀章死氏教四子盡力田畝家道小康現年七十一

韓清秀妻蕭氏年十九于歸孝養翁姑敬夫如賓生四子二女教之有方不事姑息翁姑繼歿喪葬從厚夫歿次子亦旋亡諸子

商水縣志

卷二十一

列女志

十六

各析居氏獨與孀媳王氏同炊當以節相勸勉王亦刻骨銘心以守自誓蕭現年八十五王亦四十餘

監生時畏民繼室李氏素勤儉撫前房子克變如已出畏民不善理家氏晝夜操勞家業日增生二子克化克敬延師課讀族鄰貧乏者時周濟之人爭頌德

王二學妻支氏夫早喪無子夫兄亦無嗣夫弟與妻張氏相繼沒遺三子氏憫其幼孤無依邀戚族合爨撫如已出三子皆成人以長幼分承三門

趙俊英妻胡氏十九歲于歸數年夫故無子孀姑在堂家寒甚氏矢志守節奉姑甚孝姑歿以禮殯葬以夫族姪爲嗣不幸又亡孤苦無依朝夕不給依母家以居壽七十四卒

陶春齡妻閻氏閻文章女酷貧春齡病劇氏刺股血以進春齡竟

不起氏痛於絕忍死守節現年五十餘

王振文妻趙氏貢生趙爾模女王俊儀之媳也姑卧病危甚氏焚香祝天願減已壽一紀以益姑又割股作羹以進姑病遂愈後果十二年而姑卒鄉里咸稱其賢以爲誠孝格天

王平玉妻李氏夫故無出姑患癱垂二十年氏左右奉養未嘗稍懈性端重終身無戲言

王慎終妻葉氏光緒癸卯姑病劇氏焚香祝天願減已壽以益姑復割臂肉烹以進姑病獲痊

王應科妻盧氏性賢淑事兩姑以孝聞繼姑生子乏乳氏以已乳食之已女以飯代乳繼姑性戾每食少不如意輒傾擊氏面詈罵不堪氏笑顏委曲慰勸俟怒息而後已繼姑有疾湯藥親嘗晝夜不離側繼姑稍感動兩姑相處氏周旋其間終身無閒言

商水縣志

卷二十一

列女志

十七

張天駿妻朱氏姑病服藥不效氏割股和藥以進姑疾遂愈人謂誠孝所感云

拔貢李介祜繼室馬氏有至性年十八適介祜孝事翁姑和順娣姒生二子元錄元鍾一女平日教之寓嚴於寬居家習勤苦翁病割股和藥以進人稱其孝惜命不永年三十四卒

傅振德妻蘇氏性溫淑明大義事舅姑克執婦道處娣姒無閒言治家勤儉井井有條教子嚴而有法長啟瑞州同次啟均廩生考職補用巡檢

庠生葉乃昌妻裴氏祥符舉人裴維俊女夙嫺禮義喜讀書工詩畫于歸相夫子讀贊理家政性慈好施宣統二年秋河決白帝村被溺者數百家氏勸夫齎糧米往濟又出簪釵錢二百餘緡助之惜天不永年三十餘歲卒

范明協妻張氏姑病思肉貧不能市氏私割臂肉和羹以進
王朝重妻陳氏性至孝事翁姑維謹責罵未嘗有怨言現年七十
餘

馬如松妻王氏素賢孝翁患瘡疾步履維艱氏視湯藥寒暑不離
側五六年如一日夫叔疽發卧牀數月氏敷膏丹未嘗憚煩治
家嚴整以詩書教子孫以紡績課婦女中饋井井尤能睦族親
鄰人皆愛敬之惜天不永年五十一卒子振綱振宇振道均庠
生

增生王麟祥側室傅氏先是麟祥嫡妻劉氏生三女因納側室張
氏生子松棟傅本儒家女性柔順識大體入門生一女視松棟
如已出延師課讀不稍寬假內事雖劉主之傅事嫡甚謹凡事
獨任其勞松棟年十六娶趙氏年餘麟祥歿越九月松棟亦亡

商水縣志

卷二十一

列女志

十八

遺腹生子保長又五年趙亦逝時劉已年老傅經營葬事數喪
並舉又連年荒旱田禾歉收備歷艱辛及保長娶高氏生子泮
水劉年逾八旬卒未葬而保長又歿泮水方十歲葬事皆傅經
理延師教泮水讀書高以世家女幼嫻姆訓與傅操持家計井
井有條典地贖回過半家業復興今泮水娶高氏已生子矣傅
親見元孫現年七十有九

按賢婦例不列生存以下十一人皆年過六旬賢德可紀故附於後

王文彬妻王氏年十八于歸家貧甚勸夫經商於外身親井臼晝
夜績紡家業漸興夫旋故喪葬如禮子國珍尚幼爲延師授讀
援入太學氏治家嚴有法老益精勤

劉天來妻馮氏性慈善好施有孝行天來先世陝西華陰蕉鎮人
隨父賈於商氏侍姑原籍同治間避匪亂奉六旬殘姑並三齡
弱女不遠千里來就天來艱苦萬狀夫故無子以夫姪玉亭爲

嗣教訓有法家業日增孫蔚起氏現年七十四

趙體智妻李氏事翁姑溫清無間夫兄體乾晚獲一子夫婦俱逝夫弟體道成室五年生子二夫婦亦相繼歿氏撫養三孤愛如已出皆爲成室子龍驤武庠生氏現年八十九

蘇宗卿妻蔣氏性賢淑事翁姑孝敬無違翁姑歿夫昆弟五人家貧議析居氏以夫五弟幼祖業無多可盡歸之餘自謀生皆曰善鮮有爭者尋夫故子女俱幼遺田十餘畝氏勤織紡以補不足初夫同王某營生理夫故分外欠帳百餘緡氏悉焚之又以四十餘金典王姓地四畝王欠稞不償將地私典他人氏念其貧將約退之不與校平日喜誦經惜字恤老憐貧遇橋廟善舉無不捐資相助勸夫爲鄰族排解酒筵皆出已財教子宸田入府庠氏現年七十餘

商水縣志

卷二十一

列女志

十九

增生郭燠妻張氏家貧織紡度日夫兄弟二人析居各度日氏獨養姑姑得泄瀉證卧牀四年餘氏左右侍奉無怠志歿葬以禮叔喪衣棺亦氏佐夫經營現年七十一

徐天才妻劉氏性貞嚴善治家夫少有足疾氏事之無怠志夫歿子乃文方成童乃武甫離襁褓長爲延師課讀教之甚嚴內外操勞備嘗艱苦子成立

梁子俊妻李氏鍾賢女光緒九年繼姑患癱患巾櫛衣食氏時服事跪禱神前願朔望不食三年不茹暈祈爲默佑後數年繼姑復病醫藥罔效適氏患瘧力疾奉侍願減已壽十年增之姑媳尋愈現年六十

李維欽妻馬氏中年夫故遺二子教以義方長子顓公操持家務次子剗公讀書入庠並能惜老憐貧族鄰重之

以上採訪稿

教諭王芳德妻王氏性慈孝好施予姑患癱瘓晝夜侍奉歷八年如一日四子鎮定甫生一日生母卽故氏爲乳哺養育成立五子鎮官六子鎮寮七子鎮寶其生母亡時均幼氏撫若已出人稱其慈氏尤好義戚族依氏以養者八人待氏舉火者數家氏婉言勸夫周之其濟困恤貧卽此已可概見年過七旬身體康健子八孫七皆聰穎異常人以爲積善之報云

張錫齡妻錢氏性賢淑明大義翁庠生靈淵早故夫叔銘鍾年老乏嗣氏助夫奉養二十餘年如一日光緒二十四年春大饑村人乏食季子偶吹簫氏責之曰人皆啼飢汝尙娛樂耶與夫計一家度用餘悉舉以周親族之貧者氏雅好詩書子秉初遊學愁無費氏解之曰此易易事吾自爲之乃自奉儉約於延師課讀無稍吝故秉初秉裕皆弱冠入庠長媳高氏身弱多疾氏與方調護情同母女夫教子嚴不稍寬恕氏常諭諸子曰汝曹第循家教鞭朴自不加爾且家有嚴親汝曹之福也試看浪蕩之子有不自愛而不教來耶氏中年多病及過七旬康健愈常人以爲賢德所致云

節婦

明

贈中書舍人李珠妻王氏珠早卒氏封髮自誓勤績紡以詩禮訓子垂三十年子時馨由國學任中書舍人受誥封乃卒聞於朝勅建貞節坊從祀節烈祠

郭璉妻杜氏璉病卒氏守節二十年號完璧知縣王一廉旌其門曰柏舟高節從祀節烈祠

監生傅商佐妻惠氏佐卒氏撫三子教以義方垂二十年長子嘉

言遊國學三子雅言拔貢知縣裴鉉楊一廉相繼贈貞節匾額以旌焉從祀節烈祠

張一平妻紀氏平卒氏年二十守志無玷知縣黎壯圖賜匾曰貞節可風從祀節烈祠

鄭永春妻王氏春病卒子方閱月氏勤績紡以餬口艱苦備嘗卒能成立其子壽七十餘而卒朝廷賜匾旌獎

諸生王承統妻毛氏先是崇禎辛巳十月闖寇破城闔邑殲焉統與子僕同日死難氏率幼子寬流離患難艱苦萬狀茹荼况瘁日不聊生每共人語則泫然流涕曰未亡人所以不死者徒以藐孤在也植節育孤備歷諸艱五十餘年卒能保有先緒遺孤成名壽至八十七而卒知縣郭天錦旌其門曰節壽齊芳

郭宗聖妻賀氏適宗聖未久夫歿家貧不能自存翁姑曰爾夫早

商水縣志

卷二十一

列女志

二十一

喪無子吾老矣恐無以饘汝不如早事他人氏泣曰夫亡二親何依願終養代夫送終翁姑感泣氏紡績掇薪以供二親未幾翁先棄世姑勸之如前氏志愈堅始終不變其節知縣邵瑗旌其門曰節孝流芳

孫益盛妻馬氏明末辛巳十月之變橫屍遍野盛亦殉焉氏委身認夫屍哭覓三日得之衆死髑中斂而葬之誓欲同死有子彌月恐絕夫嗣撫之以俟其成越二十年子立補庠生語云死易保孤難氏蓋爲其難者也享年八十九而卒

庠生高翔妻張氏年十六適翔閱二載翔以病故遺一子甫週歲零丁孤苦無所依賴氏躬親績紡苦志守節三十餘年教子讀書丙夜篝燈無閒寒暑子迪能遵母訓學成補邑博士弟子員知縣邵瑗表其門曰節毓雙徽

監生李又沆妻李氏生三子樹德樹勳樹言康熙五十四年沆以病卒氏年二十六上事翁姑下撫孤子備歷艱辛垂三十二年三子乃俱成立樹德娶朱氏甫一載而歿朱年十八誓操柏舟不更二姓過樹勳子爲嗣兩世孀居苦節堪憐事聞部院給匾旌獎

監生趙廷琦妻傅氏年十八于歸生二子未幾夫以病故氏卽號泣不欲生念老弱無依不得已剪髮自誓凜若冰霜孝事孀姑慈撫孤子艱辛不可名狀姑得痰疾時昏憤氏朝夕在側衣食必親爲侍奉不離左右十餘年如一日清操苦節教子義方長子昺已補博士弟子員次子景業儒衆咸謂貞烈之報云

監生李紫袍妻王氏年十七適李氏生二子長登科次登殿夫歿氏以未亡人上事垂白之姑下撫呱呱之兒集蓼茹荼垂三十

商水縣志

卷二十一

列女志

二十二

餘年里人咸服其節操紫袍胞弟紫衣妻雷氏年十七于歸甫二載夫故無嗣以死自誓嫂王氏憐之以次子登殿爲之嗣氏感激泣下節操愈勵與嫂共守清苦閨門之內肅若朝廷奉旨

建坊旌表

合舊傳

郭逢辰妻王氏年十七歸逢辰生子定甫數歲夫故氏年二十五矢志靡他苦節自勵孝事翁姑養生送死一一各盡其道翁遺幼子三人氏皆撫育之使成立各授室焉家計之暇則晝荻訓子慈嚴兼至卒能成就其子爲成均佳士云

楊大德妻時氏夫故堅志守節義方教子三人皆成立學院張表其門曰美並梁媛

王某妻程氏其淵祖母年二十夫歿誓守堅貞至八十一歲而卒學院張旌之曰苦操勵世

李如輅妻耿氏夫故志凜冰霜誓不二天清操垂四十年學院林給匾旌獎曰志完貞素

段行健妻王氏行健祖應遴父廷臣俱蚤逝祖母李氏母李氏妻王氏皆少年守義至行健歿而嗣竟絕收養族人子爲嗣三世相繼共矢柏舟知縣王夔龍旌其門曰三世冰操三節

李化龍妻張氏夫歿氏方二十歲堅志守節五十餘年知縣王夔龍旌其門曰節孝可風

李承嗣妻于氏夫故氏年二十六家貧勤績紡訓子成家知縣王夔龍贈匾曰冰雪其操

馮慶隆妻黃氏夫故氏年二十一堅志守貞遺一子教使成立苦節四十餘年足爲彤管生輝

王奮庸妻劉氏年十九夫歿有遺腹子撫之績紡度日苦節三十

商水縣志

卷二十一

列女志

二十三

八年學院張旌之曰操凜冰霜

王積妻李氏于歸甫週歲夫歿一子撫之成立娶媳張氏未幾子亦病故李痛媳張亦悲姑煢煢相依垂四十年學院旌之曰姑

媳同貞雙節

李大璞妻安氏夫歿誓操柏舟志凜冰霜里人高其節義乾隆三年奉旨建坊以旌之

李庠妻胡氏夫歿氏年二十姑病割股療之沉疴頓愈和丸教子振起先聲學院張給匾旌之曰節孝可風

王如夢妻劉氏夫故守節不醮知縣李新猷旌其門曰節孝雙高
高廷爵妻李氏夫故氏方二十歲一子早歿氏堅貞不易撫幼叔

廷祿日夜績紡勤儉持家艱辛備嘗冰操愈凜現已七旬有餘
黃致中妻高氏夫故氏卽自縊爲嫂所救得不死因勸慰至再且

許一子過繼氏乃拜謝與其堂嫂興中妻張氏共矢柏舟學憲
張旌其門曰雙操並勵節雙

王柱妻楊氏夫故守節知縣王夔龍匾其門曰風紹柏舟

李爾殿妻魏氏夫歿苦節五十二年

李謙妻石氏夫歿守志三十五年學憲林旌其門曰玉質聯輝

王永壽妻魏氏夫故氏年二十八歲無嗣三女過兄子伯行爲嗣

孝事翁姑和睦妯娌茹藥飲冰晝夜績紡苦節三十餘年現年

六十三歲

李灼妻黃氏幼年苦節堅貞自矢孝慈無虧始終不渝知縣王夔

龍匾其門曰節媿松筠

李守業妻張氏夫故年十九守節五十年而卒知縣牟繩祖旌其

門曰節孝可風

商水縣志

卷二十一

列女志

二十四

翟民祝妻焦氏年十九夫故遺腹生子撫之成立事舅姑以孝謹

稱知縣王夔龍旌以匾曰節苦孝隆

郭學仁妻張氏年二十二夫死無子苦志守節垂四十年知縣王

夔龍贈匾曰志矢兩髦

魏登庸妻高氏夫故氏年二十六無子過兄子爲嗣貞心自矢凜

若冰霜守節四十年現年六十六歲知縣王夔龍旌之曰節孝

兼篤

趙寅妻張氏夫故氏年二十一歲無子寅弟仁妻康氏寡年十九

無子與張共撫幼叔天性天化成室生子各撫一姪爲嗣冰操

苦節三十餘年知縣李新猷贈匾曰雙節全祧雙節合舊傳

庠生雷霖妻李氏青年失偶冰操自矢孝慈兼備人無閒言

王全倫妻王氏倫死氏年十九家赤貧無所養贍苦志守節三十

餘年

監生陳文成妻傅氏年十九于歸端凝恬退治家有法事上接下各盡其道閨門之內肅如也未幾夫亡氏年二十卽欲自盡以遺子兼善甫兩月勉強守義俟其成立冰操自勵五十餘年現年七十八歲松筠之節衆共稱之

監生李震旺妻王氏年十七適震旺事姑克盡婦道旺歿氏痛絕而復甦者數次以死自誓姑諭以大義乃矢志守節捐棄華飾布素自安撫育三歲姪孫秉仁如己出歷三十年如一日人稱其節孝

李堦妻柴氏節孝素著學憲張給匾曰節孝可風

李龍光妻黃氏年二十適龍光越四載夫故無嗣氏苦志守節奉侍翁姑克盡孝道翁姑歿力辦喪具務必從厚撫弟子成珂爲

商水縣志

卷二十一

列女志

二十五

嗣已守清操三十八年矣

王之炳妻趙氏年十八適之炳甫一載生子僅八日而之炳歿時翁姑已垂老氏下撫遺孤上奉二親手口拮据艱辛備嘗翁姑俱終壽考子亦卓立成名守節五十一年現年六十有九知縣王夔龍匾其門以旌之

墾官莊鼎妻高氏乾隆三年知縣李新猷給匾旌其節壽

監生李定世妻顧氏夫早亡遺子恭方二齡撫之成立娶媳史氏生一子恭又歿時翁姑皆浮柩未葬顧亦棄世史氏率八歲子竭力營葬無失禮鄉里稱其兩世節孝

節雙

張運極妻文氏夫故氏方少艾苦志守節四十八年鄉黨稱之孫大觀妻吳氏年十九夫故無子時夫胞姪冲僅三月氏遵翁姑命抱養之愛如己出教之成立入庠食餼氏年五十以病沒

孫方妻張氏年十七于歸閱五月方歿氏誓不二天孝事翁姑過
二門姪元昌爲嗣畫荻教之

王應戎妻王氏戌早歿無子氏堅不改節夫弟應科止一子學文
養以爲嗣知縣牟繩祖以勁節芳儀旌之未幾應科又卒妻張
氏亦以柏舟自矢遂以學文奉兩門嗣均不絕焉雙節

王朝陽妻李氏朝陽歿氏方十九歲守節不再醮織紡度日事翁
姑克盡婦道養生送死無少缺禮過族子以延先嗣

王庶常妻趙氏年十八夫歿矢志兩髦清節自勵歷三十餘年無
閒言

趙長松妻李氏年十七適長松越五年夫故無嗣父母欲改嫁之
李號泣不從以死自誓姑石氏有傳克執婦道時李爲孫婦凡
其姑之孝行艱苦久已動其天性故其事翁姑如石氏之純孝

商水縣志

卷二十一

列女志

二十六

焉卒年八十有四

李名元妻胡氏年二十二夫歿勵志守節清操三十年五十二歲
卒

李定元妻王氏于歸三年夫歿無嗣氏冰操自勵奉養舅姑孝心
誠篤無間晨昏姑憐之以長門三子長周爲嗣氏志節益堅績
紡度日和丸教子書聲與機聲相間節孝並美允堪儀型閨闈
監生陳兼行妻張氏于歸二年夫故後一月生子發科氏冰操自
誓紡績爲業終身不華飾撫孤成立迄今二十餘載終無二志
李一韓繼室婁氏生子爾銓爾蓉撫前房子爾錫若已出並訓以
耕讀夫亡爾錫爾銓爾蓉並孫湛俱入邑庠苦節五十餘年知
縣胡樓生匾以旌之

胡璞妻王氏年二十六夫故守節五十五年以壽終知縣王夔龍

旌其門曰闔內義方

黨三戒妻謝氏年二十五夫亡守節五十三年孫婦舒氏五桂妻夫歿卽自縊死知縣王夔龍旌之曰兩世清操雙節李又白妻許氏年二十二夫歿貞節自守矢志靡他孝事孀姑三十餘年無懈志家人咸歎服之

劉漢復妻李氏年二十五夫卒無嗣葬畢卽欲自縊一老媪勸之曰爾夫早死已爲不孝不思代夫孝親尙欲以死傷舅姑之心乎氏大感悟遂不死過夫姪茆爲嗣娶崔氏家貧晝夜紡績養舅姑終其身氏病崔氏割肉以啖其姑病尋愈人以爲苦節苦孝云

黨積德妻史氏年二十一德卒僅遺一女氏決意自守誓不再醮事翁姑溫清定省未嘗少間又迎其母與姑並事以慰母心娣

商水縣志

卷二十一

列女志

二十七

姒相處三十餘年無閒言

胡潤道妻午氏年十五歸潤道二十四夫卒一子早歿氏矢志守節孝事翁姑一市之人皆稱其賢

孫克明妻朱氏年二十五夫歿氏遵夫言貞節自持上事翁姑下撫諸叔家庭之間藹如也未幾翁姑繼逝諸叔亦亡並祖翁姑之喪停止中堂氏勤儉自勵卜地擇吉七棺俱葬亦偉矣哉牛宏寬妻張氏年二十夫亡孝事舅姑家貧紡績以資色養姑病年餘侍湯藥不懈邑令王夔龍匾其門曰壺中孝行監生郭啟昱妻李氏年二十六昱歿撫二子守節二十餘年永無他意松筠之操經霜愈堅

庠生郭寬妻趙氏寬性聰敏好讀書以父失明諸弟幼遂廢學及氏來歸力勸之讀願代奉親寬復從師三年遊泮宮時年二十

五僅生一女寬病且篤語氏曰吾雙親諸弟以及弱息悉以累卿恐卿不能終其操奈何氏泣曰願保重無慮此卽有不虞妾必終君之事乃相從於地下耳寬卒氏翦髮自誓更無他志事翁姑撫諸叔較昔尤篤翁姑歿率諸叔以禮殯葬諸叔成立各爲授室撫女嫁之

盧大受妻朱氏年二十六夫故一女方三歲氏安靜自守服闋父母欲奪其志氏曰天一而已豈可二乎吾不爲也歸室斷其髮以絕物議過長門第三子鞠爲嗣生二孫氏病家人勸服藥氏曰吾所以不死者以夫無後也今有子有孫吾事已畢尙服藥何爲越數日而卒

李某妻馬氏爾勲之母年十八夫亡矢志守節撫養遺孤苦節五十餘年年八十二卒知縣牟繩祖旌表

商水縣志

卷二十一

列女志

二十八

郭啟後妻李氏啟後幼好學能文章年二十二以弱疾病故遺一子鈺方在襁褓氏仰天號泣幾不欲生以子故未忍割棄乃清節自矢撫育藐孤事繼姑鄧氏曲盡婦道苦志二十載鈺始成立娶媳李氏未二年鈺以歿氏撫膺痛哭曰向所以不死者徒以藐孤在也今無望矣何以生爲其媳泣慰之曰姑死翁嗣遂絕矣死事小存嗣事大姑且索一子爲嗣媳願奉姑終身義無他適願姑自愛無徒苦也因相持大慟族人憐之使啟是次子鑑爲嗣煢煢姑媳相依爲命績麻茹荼冰操愈勵一門雙節允堪作式巾幗云

雙節

單嫠妻屈氏愍家貧不能娶氏年二十餘乃歸愍閱四月夫亡歲荒無以餬口氏乃集蓼茹荼手口拮据孝養翁姑服闋姑憐其幼欲嫁之囑命者使探其志氏厲聲曰我志決矣命何能爲遂

翦髮示無二心翁姑爲感泣命養其姪水泰爲嗣以終其志
朱緒倫妻郭氏年十七適緒倫甫四載夫故無嗣翁姑早逝煢煢
無依惟倚祖姑白氏晝夜績紡撫育弱叔學倫苦節十餘年始
得成立授室過其子潤生爲嗣

雷浙妻王氏年十八于歸生二子開春動春夫歿氏年二十四仰
天泣血幾不欲生以親老子幼冰霜自凜手口拮据垂六十年
如一日

李崇德妻任氏年二十四夫故無嗣矢志貞節清操凜然歷久不
渝知縣李新猷以幽人貞吉匾額旌之

庠生單又桓妻柳氏年二十七夫故無嗣堅志守節事翁姑曲盡
孝道二親歿盡哀盡禮以婦兼子職遠近稱之取長門次子經
正爲嗣教以義方早年成立知縣李新猷匾其門曰節孝可風

商水縣志

卷二十一

列女志

二十九

張志行妻黃氏年二十九夫故子方一週翁姑在堂氏矢志守節
孝事翁姑慈撫幼子伶仃孤苦備歷艱辛及翁姑卽世一切喪
葬盡禮盡制未幾子妖亡慟傷之至遂亦尋歿其節孝洵可風
云

張邦勲妻王氏生員王作璣女素嫻內則閨範靜穆十八于歸邦
勲克盡婦道事舅姑以孝聞舅尋歿夫故氏年二十四無嗣氏
事孀姑養生送死靡不盡禮過長房子得木爲嗣慈愛備至無
異已出

廩生趙廷球妻李氏庠生榮桂子媳也年十八適廷球越十一載
夫歿勵志冰霜時子幼翁病竭力奉事曲盡孝道教子讀書雖
盛暑嚴寒不輟鄉里貧不能學者爲延師教育之成就甚夥子
馮登乾隆戊午賢書孫承歡補增廣生

監生許爾翼妻鄧氏年二十于歸越四載夫故乏嗣既無伯叔終鮮兄弟矢志守貞奉事翁姑不以孤苦易節翁患癰氏籲天求代茹素終身知縣李嘉其節孝爲擇嗣以繼之

魏某妻王氏年二十夫故守節孝親撫孤乾隆六年地保及村長王正南報魏陸奇義行並舉獎銀牌查卷補

庠生王統繼室郭氏時前房子臣方週歲氏撫之若已出後舉一子文年十三夫歿家貧子幼日夜績紡以教育之二子克承母志相繼入庠卒年七十有五

張汝謨妻王氏夫故時年二十七柏舟自誓之死靡他教諸孤以義方雖大寒盛暑莫之貸故子皆卓然成就少子正觀尤爲膠庠傑出卒年七十八

監生李紹韓妻趙氏年十七適紹韓姑張氏失明事之曲盡婦道

商水縣志

卷二十一

列女志

三十

及夫歿姑愈衰老遺孤爾彥未週歲氏事老撫幼敬禮恩勤愈於往時及爾彥成立娶張氏甫三載病故無嗣氏一痛幾絕誓不欲生張氏慰勸再三甘守貞節以奉姑族人憐其節義爲立嗣子洽以主其祀姑媳相依一門雙節雙節

閩豫妻徐氏年十七適豫逾三月夫歿矢志堅貞冰霜自凜撫夫姪作梅爲嗣氏奉事孀姑終始不懈開封府丞趙公給匾旌獎卒年八十有四孫寅邑庠生曾孫濟濟俱業儒人謂貞節之報云

王察倫妻魏氏夫早亡無子矢志冰霜之死靡他以夫弟依倫子心誠爲嗣學正給匾旌之曰守節全桃

胡悅妻李氏年十九賦桃夭甫三載夫故無嗣氏仰天泣血誓不欲生既以翁姑在堂叔錦紳方二歲無可代其責遂慨然曰是

余之任也於是上事翁姑下撫弱叔溫清愛養無間朝暮後翁老病且篤氏自割股作羹以進翁尋愈聞之感傷命過錦紳子得木爲嗣氏亦撫之若已出歷三十餘年無逾初志云

李治方妻柴氏年十八賦桃夭閱四載夫故遺孤方一週氏號泣不欲生既而慮絕夫嗣乃矢志柏舟績紡教子苦節清操歷五十四年子在庠生

監生李枚繼室胡氏年二十二夫故時前房子述先方一週氏撫若已子孝事翁姑朝夕紡績苦志清節歷三十餘年述先成立

入太學

以上舊志

